

欽定大清會典事例

卷

三百五十五至
三百五十七

禮部

貢舉

欽定大清會典事例卷三百五十五

禮部

貢舉

恩賜二

嘉慶元年。丙辰科會試。年老舉人鄭泳等三名俱

欽賜國子監司業銜。汪錫等一百四名俱

欽賜翰林院檢討銜。謝煦等十四名俱

欽賜國子監學正銜。○三年。戊午科鄉試。順天年老諸

生于江元等三十二名。江南陳榮起等三十名。浙江林與庚等十一名。江西周大起等二十六

名。福建張觀法等七名。湖北曾夢張等九名。湖南唐絀傳等十八名。河南蕭宗思等八名。山東朱克謙等五名。山西李晚榮等九名。陝西魏夢龍等九名。四川謝錦等七名。廣東劉學藻等六名。廣西黎晃一名。雲南省苗世溥等四名。貴州白猶龍等二名。俱

賞給舉人。馮士甄等一百六十六名。俱

賞給副榜。○四年

諭。本日召見朱珪。詢問蔡新之子曾否在京會試。據奏蔡新有子蔡本俊。係內閣中書。現在入場未經中式。

等語。蔡新在尚書房行走有年。老成謹慎。以大學士
予告在籍。年已九十有三。伊子蔡本俊著加恩一體
殿試。○又原任大學士朱軾元孫朱振聲。朱景華。引
見。奉

旨。朱振聲。朱景華著賞給舉人。准其一體會試。○又已
未科會試。各省年老舉人周大器等三名俱

欽賜國子監司業銜。陳可久等九十五名俱

欽賜翰林院檢討銜。張玉柱等二十四名俱

欽賜國子監學正銜。○五年

諭。本年順天鄉試。尚書朱珪之孫朱涂。入場應考。未經

中式。因將伊硃墨卷取閱。其制藝詩策俱屬平平。原難入選。同考官未經呈薦。而主考亦未按錄校閱。本為公當。但念朱珪前在尚書房行走。曾授朕詩文。且敷歷有年。恪共厥職。現在伊孫止有朱涂一人。其試卷文理亦無大疵。朱涂著加恩賞給舉人。一體會試。

○又

諭謝啟昆奏廣西省鄉試未經中式年老諸生一摺。該省鄉試年老諸生。該撫於榜發後自應即時查明具奏。候朕降旨加恩。乃廣西省自九月揭曉後。直至十一月始行具奏。此數月中該撫奏事摺便甚多。何難

早為附入。該省又無別項緊要事件。何以遲滯乃爾。至陝甘貴州兩省年老諸生。至今亦未奏到。此等循例具奏事件。有何難辦。若實無年老諸生。亦應及早附摺陳明。乃遲延至今。可見外省於地方事務。辦理延玩。大率類是。除謝啟昆先行傳旨申飭外。所有陝甘貴州原辦之監臨官。亦著傳旨申飭。其廣西年老諸生。俟陝甘貴州兩省奏到。再降恩旨。○又庚申

恩科鄉試。順天年老諸生曠大澄等四十九名。江南汪

步南等九名。江西彭出圖等四十七名。浙江康辰等十一名。福建謝其昌一名。湖南胡德盛等

十七名。河南高登俊等十四名。山東尹秀生等六名。山西孫百齡等七名。四川鮮文美等五名。廣東黎道新等十五名。雲南向舒等十三名。廣西謝天惠等二名。陝西王怡體一名。俱

賞給舉人。遂廷獻等一百三十九名。俱

賞給副榜。○六年辛酉

恩科會試。各省年老舉人尹秀生等。俱

欽賜國子監司業銜。吳涵等。俱

欽賜翰林院檢討銜。郝騰龍等。俱

欽賜國子監助教銜。張良純等。俱

欽賜國子監學正銜。○又原任大學士田從典之孫田

玉麟。原任大學士李光地元孫李維翰。原任大

學士王熙曾孫王元洪。原任大學士吳璵四世

嫡孫吳沆。原任禮部尚書楊名時曾孫楊景曾。

原任刑部尚書魏象樞六世孫附生魏煜。原任

工部尚書湯斌四世孫生員湯念曾。原任江蘇

巡撫徐士林之孫徐從旭。原任福建巡撫潘思

榘曾孫潘福寶。節次引

見奉

旨。俱著賞給舉人。准其一體會試。○又

諭。朕因原任大學士蔡新宣力年久。在籍身故。特降旨令該省巡撫於伊孫中選擇一二人。送部引見。嗣經吏部將蔡新之孫舉人蔡行達帶領引見。因其現屆會試。本欲俟伊中式後再行錄用。茲已揭曉。未經取中。著加恩賞給進士。准其一體殿試。○又

諭。吉慶等奏拏獲海康縣糾衆結盟首夥各犯。其縛送會匪多名之貢生歐賢星。監生游世傑。均屬出力。著加恩賞給舉人。准其一體會試。○又

諭。朕此次回京。有山西已革舉人薛載熙。在燕郊接駕。朕記其名姓。係屢經接駕。且曾經考試。詩句平常。飭

令回籍者。復命以詩題。再行考試。所限官韻甚窄。並令軍機大臣派員監考。所作詩句。較前稍勝。薛載熙著加恩賞還舉人。下次准其一體會試。○又

諭。向來年老諸生。有志觀光。三場完竣者。經監臨查明

奏聞後。均降旨分別八十七十以上。賞給舉人副榜。原以加惠耆儒。用昭作人雅化。本年辛酉科鄉試。順天及各直省先後奏到。朕披閱單內所開諸生年歲。有由七十以上開列者。有由八十以上始行開列者。及有扣出近年入學者。亦有並未聲明者。辦理殊未畫一。本日阮元奏到浙江年老諸生摺內。則係查明

諸生入學年分在三十年以前至六十年者。始行開列。其餘近年入學浮開年歲者。悉行扣除等語。應試諸生。年歲原應覈實開報。其浮開年歲者。自應扣除以杜冒濫。但該撫必拘定入學自三十年至六十年者始行開列。則諸生入學時。或已屆五六十歲。豈復能仰邀恩賜。未免向隅。辦理殊為過當。此事止須查明該生實在年歲。果係八十以上七十以上者。奏明酌量加恩。各省一律辦理。以期無濫無遺。轉不必拘定入學年分。其應如何分別章程。使各省一體遵行之處。著大學士會同禮部妥議速奏。所有本年各監

臨奏到年老諸生。俟奏准後照新例辦理。欽此。遵旨議奏。年老會試舉人

賞給職銜。始於乾隆元年。年老鄉試舉子

賞給舉人。始於乾隆三十五年。其分別八十歲以上賞給舉人。七十歲以上

賞給副榜。始於乾隆五十四年。該生等原以年老蒙

恩。以詳查年歲為本。舊例相沿。各學政報部生童名冊。及各省送到舉人副榜題名錄。均未註明年歲。部冊無可稽查。嗣後各學政報部名冊。及各省題名錄。均於姓名下註明年歲。俟鄉會兩場

具奏年老舉子之時。

敕交禮部覆覈相符。再行具奏請

旨。所有會試舊科舉人。向無年歲底冊者。以地方官印文為憑。其俊秀貢監。雖學冊無名。而戶部執照。亦各註年歲。令各學政於錄科時。驗明執照。造冊彙送監臨。於具奏單內聲明。年歲先有根據。舉子自不能冒濫。至此次外省有以新進扣除者。以年在七十以上扣除者。以入學三十年六十年為斷者。辦理未能畫一。通飭各該督撫一體查明補奏。以免向隅。

謹案鄉會試具奏年
老諸生。先

敕交

禮部覆覈年歲相符。
再行請旨。始此。○又

諭前因各省奏到年老諸生單內。其所開諸生年歲及有無入學年分。均未畫一。特降旨交大學士禮部會議辦理。昨據大學士禮部會議具奏。已照議准行。本日全保奏到湖北年老諸生摺內。恭錄乾隆五十九年原奉

諭旨一道。因係孫士毅所奏年老諸生。將例監及入學年分較近並精力衰邁不能進京者。概行刪去。曾傳知各督撫遵行。現在各督撫奏到年老諸生摺內。並未一體恭錄。昨大學士禮部會議時。亦疏漏未敘。其

議定章程與前奉

諭旨。尚未盡合。自應再行妥議。令各省畫一辦理。著仍交原議之大學士禮部詳細妥議具奏。欽此。遵

旨議定。嗣後各省辦理年老諸生。如果三場完竣。即一

體奏請

施恩。其進京與否。悉聽其便。至俊秀例監內有年屆七十八十始行捐監入場者。所開年歲先不可信。應查明扣除。以杜冒濫。但亦有係少壯捐監。早經應試者。年歲既載明執照。無可假託。迨年老未邀中式。其場屋之苦。與諸生相同。嗣後查

明各省例監。其捐監在十科以前曾經應試者。即照生員等七十八十歲數之例。一體奏請

賞給。至近年入學諸生。自不必拘定入學年分。如入學雖久。而覈對學冊。浮開年歲。即應扣除。如甫經入學。而年歲若干。業經廩保出結。並同時應試童生出有互結者。是其中本無捏冒。仍照例賞給。○是年辛酉科鄉試。順天年老諸生李咸賓等五十名。江南吳思齊等四十二名。江西汪瀾等二十四名。浙江沈振麟等十名。福建陳開泰等八名。湖北盧薰等九名。湖南艾卓雲等二十名。

河南趙洽等十名。山東劉鎧等十六名。山西李義交等十二名。陝西康注等二名。四川楊名遠等二名。廣東朱鉦等二十二名。廣西李伸等十六名。雲南王來培等六名。貴州劉攀雲等二名。俱

賞給舉人。黃廷楷等二百三十九名。俱

賞給副榜。○七年。壬戌科會試。各省年老舉人李東耀

一名。

欽賜國子監司業銜。劉珩玉等五名。俱

欽賜翰林院編修銜。孫鉞等一百十一名。俱